



UNIVERSITÄTS-
BIBLIOTHEK
PADERBORN

Universitätsbibliothek Paderborn

**R. P. Joannis Nadasi, è Societate Jesu, Annus Caelestis,
Jesu Regi, & Mariae Reginae, Sanctorum Omnium Sacer**

Anni Caelestis Dies, & Festa Mobilia


Nádasi, János

Coloniae Ubiorum, 1667

Anni Caelestis Martius.

[urn:nbn:de:hbz:466:1-53527](https://nbn-resolving.org/urn:nbn:de:hbz:466:1-53527)

viam, ne te amem ita, ut Deo placeat!



ANNI CAELSTIS
MARTIUS.

1 Martii. Kalendis Martii.

S Siviarde Abba, qui, in mortuali lectulo, ajebas ad tuos: *Videbit qui vis, quàm benè nobis voluerit Deus; & illos multis, ad perseverantiam, & æstimationem gratiæ Dei, hortatus, felici adeò morte discessisti, ut anima tua, Sanctorum Apostolorum, Petri & Pauli, manibus, cælo inferri sit visa. Ora, ut æstimem gratiam Dei, & semper; ut gratia Dei in me vacua non sit, sed plena semper, usque ad mortem, usque ad æternitatem, in quâ verè videbit qui vis, quàm benè nobis voluerit Deus. Amen.*

Sancti ducenti sexaginta MM. sagittis interfecti.

S. Angele Custos, cujus cultui hodiernus dies à pluribus in Hispaniâ dedicatur.

S. Isci Ep. M. qui celeberrimæ consecrationi altaris S. MARIÆ de

de Columnâ Cæsaraugustæ interfuiſti.

S. Leo, quem adventantem è saculo, divinitus monitus Abbas, Luca nomine, ac sanctâ veste donavit, & dixit: *Ecce, fili mi, ascendisti in Crucem Domini tui. vide, cuite socium adjunxisti.* cujus, amore Dei laborantis, manum mordens serpens nil nocuit. qui cum esurientibus dedisses panem, quem unicum habebas, vesperî cælitus pastus es, repertis tribus panibus candidis, & calidis. ad quem ne proficisceretur quidam, jumentum, quo vehebatur, pedibus se demon Serpens impituit: qui solidâ virtute, persanatis ægris, energumenisque mirabilis, centesimo ætatis, octuagesimo vitæ asceticæ anno, inter circumfusam odorum è cælo fragrantiam, morte, quam prædixeras, excessisti.

S. Donate, piâ lectione ad virtutem accense, postea M.

Sancti Leo, Donate, Abundanti, Nicephore, & alii novem MM.

Sancti Hermes, & Hadriane, MM.

S. Eudocia, gladio M.

S. Antonina, post varios cruciatu;

tus, in vase quodam inclusa, in paludem demersa.

S. Svivberte Comes, Ep. antè, quàm nascereris, matri, stellæ, Germaniam & Galliam illustrantis, specie præmonstrate: qui mortuum precibus, & osculo ad vitam revocasti: qui post mortem muto adolescenti visus es, eúmque sanasti, os ejus ungens, ac dicens: *Dominus JESUS, qui tetigit linguam muti, det tibi loquelam tuam; in cujus nomine dico tibi: Loquere, & da laudem Deo Creatori tuo.* cujus mortui manum osculatus mutus & surdus, audiendi loquendique facultatem recepit. qui nobili ægro lunatico apparuisti, eúmque in bono proposito nutantem confirmasti, corpore etiam per sanato, cum illi diceres: *Quare cor tuum illicitis cogitationibus lanigare non reformidas? Non incipientibus, sed in bono perseverantibus, meritorum præmia conferuntur.* Et ille sanus surrexit, ac in Religioso Ordine, in probatissimi exempli virum evasit. Firma cor meum, ut perseveranter adhæreat Deo.

S. Albine Ep. qui dæmonem, osculo fœminæ, instar vesicæ sanguineæ, incumbentem fugasti: ad cujus sepulchrum tres paralytici sunt curati,

curati, postquam eorum uni à cælesti viro dictum est: *Quousque dormitas, & sanus fieri non desideras?* qui in vitâ cæcum dæmoniacum, & alios cæcos sanâsti, mortuum sulcistâsti, & ne impiæ sententiæ subscriberes, à Deo per mortem ereptus es.

S. Herculane Episc. M. decollate, cujus caput, sinè ullo incisionis vestigio, quadragesimo post mortem die, corpori conjunctum, repertum est.

S. Domnina V. quæ in materni horti ergastulo, tantâ modestiâ in oculis, & linguâ, custos habitâsti, ut vultu semper tecto esses, ne videres ullius faciem, vel ne à quopiam viderere; nec ulli, nisi necessitate urgente, idque ita modestè, ut agrè audirere, locuta es.

S. Rudesinde episc. in cujus morte vox Cælitum, *Te Deum laudamus*, canentium, est audita: ad cujus sepulchrum fusa oratio fecit, ut quidam, qui Religiosos tuos vexabat, eodem tempore, in lecto, strepitu magno, medius crepuerit.

OMNES SANCTI, &c.

pag. 44.

S. MARIA, coram cujus imagine orans hodiernus S. Leo Lucas, elephantia-

phantiacum illicò persanavit. Sana
me, Domina: arce à me lepram cordis,
& quicquid non placet oculis Dei mei.
Doce me, coram tuis imaginibus, ita
orare, ut pro me, ac pro aliis, cor mun-
dum obtineam!

S. MARIA, qua in Cubas Hispa-
nia, puella, animalia pascenti, hodie,
& per octo sequentes dies, apparens,
templum illud miraculis celebre tibi
condi iussisti. Ora Deum, ut dignetur
tibi operam meam, ad gloriam suam, &
tuam, licet sim vilis, & nihil!

S. MARIA, qua, hoc die, cum SS.
Seraphinis, & SS. Paulo, Benedicto,
ac Mariam Magdalenam, S. Franciscæ
conspicua, ejus caput in tuo sinu fovi-
sti, eam aureo tuo pallio amanter te-
xisti, ac pretiosum Christi monile
esse dixisti. Socias verò illius monuisti,
ut haberent cor mundum, animum-
que sincerum; & nihil eis fore difficile,
si non desit eis amor, atque humili-
tas. Tege me, Domina: orna cor
meum aureo monili amoris & humili-
tatis!

2 Martii. 6 Nonas Martii.

S. Ceadda Ep. qui extremi & hor-
rendi Judicii semper memor, ad-
ventos, tonitrua, fulmina, velut
horren-

horrendi illius diei imagines, in preces, & lacrymas solvebaris. Tibi, septem ultimis vitæ diebus, & frater tuus jam antè mortuus, & Angeli musici, te ad cælum iucundo cantu invitantes, adfuerunt, eoque te abduxerunt. Sancte Ceadda, invita me, unà cum Angelis, & fratre tuo; ut, per mortem beatam, abeam ad illam patriam, quæ supra ventos omnes, supra omnia fulmina est; ubi nullus quicquam timebit unquam. Amen.

Sancti Jovine, & Basilee, MM.

Omnes Sancti, Romæ diù cruciati, & capite damnati, MM.

Sancti Paule, Heracli, Secundilla, & Januaria, MM.

S. Luci Ep. Absalon, & Lorgi, MM.

Sancti octuaginta septicimè cæli MM.

S. Simplici Papa.

S. Macra V. M. cui laniatum pectus Angelus persanavit.

S. Carole Bone Comes, qui *omnibus diebus, operum tuorum initia Domino dedicabas*: qui nudipes ad mensam pauperibus ministrabas: quotidie quinque pauperibus novas vestes dabas: ad cuius, cum coram B. Virginis arâ orares, trucidati

dati corpus paralyticus sanatus est :
cujus pileo febres depulsæ sunt :
impetra mihi cor plenum sanctæ
humilitatis, & charitatis.

S. Luca Cafali, cui, cum jam cæ-
cus iter faceres, illudere volentes
comites tui, dixerunt : populum
concionem à te præstolari. tu verò,
conscenso tumulo, de Deo ardentè
locutus, cum finem dicendi faciens
diceres, *per omnia secula seculorum;*
fata circum omnia (ut cæco Bedæ
aliàs) disertè respondere, *Amen,*
Amen. & comites tui eo miraculo
ad bonam frugem conversi sunt : ac
postea ibidem templum sub tuo
nomine erectum est.

OMNES SANCTI, &c.

pag. 44.

S. MARIA, *qua de hodie mortuo*
Arnulpho tuo, jam olim dixeras: Vas
electionis est mihi iste. Elige me,
munda me; ut sim vas electum à Deo,
in honorem tuum!

3 Martii. 5 Nonas Martii.

S. Kunegundis Imperatrix, Virgo
Conjux, quæ, illæsis pedibus,
candenti ferro inambulâsti; post S.
Henrici Imperatoris conjugis mor-
tem, Religiosa in cœnobio vixisti;

○

mori-

moritura, S. Henricum, conjugem tuum virginem, è cælo tibi præteritam vidisti, & secuta in cælum es corpore tuo in ejus sepulchrum illato, & illo tibi locum penès se ultrò parante; ut Romæ S. Stephano S. Laurentius: ac postea vitam ad tuum tumulum mortui reperere. O reperiam ego, per tuas, & sancti tui conjugis, preces, in morte meâ vitam! ut in æternitate vitæ vivam cum Henrico tuo, & tecum, apud vitæ fontem Deum, cujus melior est misericordia super vitas. Amen.

S. Leo Ep. M. cujus caput, pro Christo amputatum, fontem excitavit, & Angelo comite, à te ad unum stadium est deportatum.

S. Titiane Ep. qui morte, illo die, quo prædixeras, obitâ, cuidam apparuisti gloriosus è cælo.

Sancti Marinemiles, & Asteri senator, Martyres.

Sancti Hemiteri, & Cheledoni, milites Martyres; quorum capita cum licitor amputaret, in omnium conspectu, alterius vestrum annulus aureus, alterius candidum linteam, in cælum evedum est.

S. Caluppane, super cujus, in saxo concavo habitantis, caput serpentes cadebant, collo tuo ligati,
nec.

nec tamen te lædentes : cujus ori draco os suum conjunxit; sed à te Oratione Dominicâ est fugatus.

Sancti Felix, Luciole, Fortunate, Marcia, & focii MM.

Sancti Cleonice, Eutropi, & Basilisce, milites, pro Christo crucifixi.

S. Winvaloce Abba, regiâ stirpenate, cui S. Patritius, vultu Angelico, auro coronatus, apparuit: qui tui etiam discipuli matrem, ut sanctius moreretur, à morte revocasti ad vitam; & sanctâ, quam ab Angelo didiceras, morte, ad aram, post acceptum sacratissimum viaticum, obiisti; ad quam te, centies de die, & nocte centies orando flexis genibus, præparabas, & ad quam te invitans Angelus, dixit: *Euge, Winvaloce, serve Dei! Calisola omnes te civem cupiunt habere suum.*

OMNES SANCTI, &c.

pag 44.

S. MARIA, *quæ impetratâ hodierno tuo Ruperto sapientiâ, monuisti: Ne torpescas otio; & gratiam tibi datam ne negligas. Doce me scire, quæ scire debeo; nescire, quæ debeo ignorare, & ut gratia Dei in me vacua non sit!*

4 Martii. 4 Nonas Martii.

Virginee Casimire, qui summâ hieme cilicio potius, quàm regiâ veste, indutus, templa nudipes obiisti: cui pro lecto regio, terra placuit: qui mori virgo maluisti, quam non virgo vivere: qui candidatus, etiam post mortem, eques, præsentem opem tuis pugnantibus attulisti: cujus integrum corpus, plurimis post annis, repertum, & super pectus inventus MARIANUS ille tuus hymnus, quem tu *omni die* MARIÆ dixisti. Scio, illa me morientem sequentur, usque ad æternitatem, quæ Dei, quæ MARIÆ honori, amori, dixero, fecero. Adsis mihi in agone pugnantem, & pro me ora; ut ita *omni die dicat* MARIÆ *mea laudes anima*, ut in supremo vitæ die, ad sinum MARIÆ vadat *devotissima*. Amen.

S. Agathodore M. qui, quemadmodum S. Jacobus, magister tuus, apud Cæsaraugustam, & Braccaram; ita tu Tarraconæ, augustissimæ Dei Matri templum condidisti, ac sub ejus nomine illud Deo dedicâsti.

S. Luci Papa, decollate.

Sancti

Sancti nongenti Romani MM.

Sancti Cai, & Palatine, in mare demersi, & alii viginti septem MM.

S. Hadriane, qui post horrenda, & varia supplicia, & mortem, Nataliam conjugem tuam ad cælum invitans, dicebas: *Veni ad nos in requiem tuam*: & illa te felici morte secuta est invitantem.

Sancti viginti tres MM. crurifragio consummati.

Sancti Archelae, Cyrille, & Photi, MM.

Sancti Basili, Eugeni, Agathodore, Elpidi, Ætheri, Capito, Ephram, Nestor, & Arcadi, omnes Episcopi Martyres.

S. Petre Abba, qui, ut Deo soli vacares, Episcopatu deposito, carnem loricâ, & jejuniis domans, ter millenis plures Christo religiosè initiâsti discipulos: qui eversâ naviculâ, in mare cadens, ficcus per aquas ad littus evasisti: qui tepido Religioso per quietem visus, eum cecidisti, & spiritu ferventem fecisti: à Religioso moriente dæmonem, in avis nigræ specie illi visum, aquâ lustrali fugâsti: post mortem obtrectatori cuidam in somno visus, eum verbis, ac verberibus

beribus corripuisti: alii magnæ virtutis Religioso sæpius conspectus, eum, si quâ in re erraret, monuisti: alium inquietum, minaciter arguisti: alium negligentem, ad orandum pro mortuis, & ut se ad mortem, brevî obcundam, præpararet, hortatus es. Excita èt me; hortare, mone, move, corripe: fac, ut ita flagranter ac sanctè agam, atquè si te, vel alium è cælesti curiâ, præsentem hortatorem viderem, & audirem. nam verè adest mihi, me videns, Deus; licèt illum ego non videam.

OMNES SANCTI, &c.
pag. 44.

S. MARIA, cum cuius quotidiano hymno, pectori imposto, S. Casimirus voluit sepeliri. Fac, ut ita faciam omni die, quæ amori tuo facio, ut etiam post mortem illa tibi honori, mihi solatio sint?

5 Martii. 3 Nonas Martii.

S Conon, cum virgine conjugæ virgo, qui S. Michaëlem Archangelum magistrum habuisti, quomodò ad baptismum, quomodò ad sacrosanctum Christi Corpus, debeas accedere: qui parentes

rentes tuos, à te Christo genitos, ad illa Martyres præmisisti, & magnum in dæmones imperium habuisti. Doce me ad altare sanctum accedere, prout à magistro tuo Angelo didicisti: ut fugatis victis dæmonibus, ita nunc divino illo Sacramento utar, atquè si pro viatico æternitatis illud moriens acciperem: moriens verò ita ultimo illo viatico muniar, ut habeam feliciter in itineribus æternitatis ejus, quem in Sacramento adoro, & utinam sanctè! sumo, Dei mei JESU. Amen.

S. Drausi Ep. ad cujus sepulchrum qui pernoctabant, redibant semper de hoste victores.

S. Eusebi Abba, qui, admoto S. Hieronymi magistri tui cilicio, tres mortuos excitasti: qui Sacramentis, & eodem cilicio munitus, humi in agone mirabilè jacuisti, eum hoste tremendo anxius conficiens, & clamans: *Non faciam, mentiris.* Tum fugatis à S. Hieronymo, tibi apparente, hostibus, agonem difficillimū feliciter consummasti, & mortuus miraculis coruscasti, magnum in agone laborantium timoris, & spei documentum.

248 ANNI CÆLESTIS

S. Phoca, ex hortulano M. cuius basilicæ januam, si quispiam à serpente morsus attigerit, confestim sanatur.

S. Hadriane M. leoni objecte, gladio jugulate.

S. Eusebi Palatine, & alii novem MM.

S. Theophile Ep. sapientissime, atque sanctissime.

S. Gerasime Anachoreta.

S. Virgili Archiep. qui dæmones, sub specie naviculariorum, onustam navem adductam tibi ostentantium, infidiosos, Cruce fugasti: plures mortuos suscitasti: ad cuius preces crepuit serpens, qui multos occiderat: qui cilicio semper indutus, cæco etiam lumen reddidisti. Pelle à me infidiosos dæmones, quacunque specie mihi infesti sint: & cordi meo impetra lumen Dei, ac spiritum mortificationis.

S. Wenceslæ, hodie translate Rex, Martyr, & Virgo. quem S. Ludmilla avia persanctè educavit: quem, in Imperatoris aulâ despectum, Angeli aureâ Cruce signatum deducere sunt visi: qui S. Vito M. Pragæ templum nobile extruxisti: cui equum conscendenti, hastam ab Angelo porrigi vidit hostis
tuus,

tuus, ac vocem, quâ monebatur,
audiit; *Ne feri.*

OMNES SANCTI, &c.

pag. 44.

S. MARIA, è cuius, hodie mortui,
clientis ore tres flores gelsimini, & sa-
cro sanctis JESU & MARIÆ nominibus
insignes, excrevere. Effice tuis precibus,
ut JESUS mihi sit Salvator JESUS; &
tu sis mihi MARIA, Domina, illumi-
natrix, imitatrix Dei stella!

6 Martii. Pridie Non. Martii.

S. Coleta, cui peccata Orbis, &
destinata illis supplicia, divini-
tùs sunt ostensa: quam S. Franciscus
Christo, & Christi Matri sistere, ac,
pro restituendâ sanctimonialium
disciplinâ, supplex petere est con-
spectus; Christo ejus precibus an-
nuente, à quo missos tibi pro cœno-
bio aliquando quingentos aureos
accepisti: cui omnes, quibus arctio-
rem disciplinam persuaseras, cum
morerentur, apparebant: quæ ali-
quando etiam S. Annam, cum MA-
RIA, JESUM parvulum manu tenen-
te, vidisti: è cuius orantis ore visus
est sol magnus oriri: quæ aliquan-
do divinam hostiam glutire non
prius poteras, quàm divinæ inspira-
tioni

tioni annueres : quam ægram An-
 geli , ac Deipara demum inuisit , &
 amplexu , ac osculo salutavit : circa
 quam de Christi , Deiparæ , ac Sar-
 cotorum humilitate , aliisque virtu-
 tibus loquentem , conspecti sunt
 sedere duodecim Apostoli ; quibus
 in cælum redeuntibus , tu quoque
 visa es in sublime attolli . O religio-
 si zeli Virgo , exosa tepidis , & dæ-
 monibus ; familiaris Angelis , aliis-
 que Cælitibus ; à S. Joanne Apo-
 stolo , Christo per annulum de-
 sponsata ; cui ipse se in Eucharistiâ
 dedit Deus ; quæ JESUM , è MARIÆ
 sinu , vulneratissimum , in sinum
 tuum accepisti , & MARIAM , Christi
 tormenta singillarim narrantem ,
 Christumque à maturis , & à pueris
 tam fœdè tractatum , audisti : unde
 èt Martyrum perpeti tormenta pe-
 tens , dolores atrocissimos persensisti :
 quam denique morientem , vel-
 ut Sponsam suam , domum in cælum
 duxit JESUS . Ora , ut vita , &
 mors mea , non sit vulnere , sed solatio,
 tuo , ac Deo meo JESU , & MARIÆ ;
 ut èt ego in mortis horâ deducar
 in domum illam , in quâ beati
 sunt , qui habitant : ut , unâ cum illis ,
 in sæcula sæculorum , laudem te ,
 qui Sanguine tuo æternitatem il-
 lam

Iam emisti pro me, Redemptor
JESU! Amen.

Sancti Victor, & Victorine, qui,
post multa tormenta, cum Clau-
diano, & Bassâ ejus conjuge, in
triennali carcere Martyres expirâ-
ntis

S. Marciane Episc. M.

S. Evagri, lux Episcoporum.

S. Conon, qui pedibus clavis
confixus, ante currum currens, in
oratione spiritum reddidisti.

Sancti quadraginta duo Marty-
res.

S. Basili Episc.

S. Fridoline, qui Ursum, virum
nobilem, à mortuis, ut tibi testis
pro justitiâ fieret, revocâsti.

S. Rosa Viterbiensis V. hoc die
mortua, & quartâ Septembris trans-
lata: è cujus tumulo, à cæcis illu-
minatis, ac mortuis suscitatis, mi-
rabili, manna manavit, & oleum
contra morbos: cujus corpus à
morte integrum, postea etiam ab
igne, vestes, ac omnia in cineres re-
digente, mansit illæsum. illumina-
me, suscita, & accende igne illo, cu-
juseca cor est.

OMNES SANCTI, &c.

pag. 44.

S. MARIA, qua hodierna tua Co-
letæ

letæ linguam solvisti: ô, esto gubernatrix lingua mea; ut cum Deo, & cum hominibus, ita loquatur, uti Deus vult!

7 Martii. Nonis Mart.

S. Thoma, Theologe Angelice, qui, ubi fœminam ardenti titione è conclavi expulisti, de carne victor, ante Crucem flexis genibus orans, per quietem ab Angelis tibi constringi lumbos sensisti, & omni postea semper carnis molestiâ caruisti: quem è cælo visens Romanus, tuus olim socius, dixit, se in purgatorio, negligentia cujusdam pœnas dedisse per quindecim dies: rogatus à te, de visione beatâ, respondit; *Sicut audivimus, sic videmus in civitate Domini virtutum.* Tu nunquam te studio prius, quam oratione præmissâ, dedisti; & à Crucifixo audisti: *Benè scripsisti de me, Thoma; quam ergò mercedem accipies?* & respondisti: *Non aliam, Domine, nisi te ipsum.* Tu ecstasibus admirabilis, lectioni sanctæ addictissimus, divinitus in multis edoctus, Sancti Petri, & Pauli, aliorumque apparitionibus felix, à splendore, brevè te ad gloriam æternitatis evocan-

evocandum, intellexisti; & post mortem sanctam, cum Angelis, & Alberto, magistro tuo, coram throno Divinæ majestatis, à B. Mathilde, Cisterciensi Virgine, conspectus es; ac postmodum, ob puram in omnibus intentionem, stellato pectore apparuisti gloriosus. Impetra, quæso, stellam hanc cordi meo: ora pro corde meo; ut ne sinat illud JESUS, & MARIA, ne sinant illud Angeli, ullo unquam crimine maculari: sed sit ad JESU Crucifixi, & MARIÆ, gloriam vita mea, mors mea, æternitas mea. Amen.

S. Perpetua M. quæ per quietem, angustam & auream scalam, in cælum usque porrectam, vidisti, plenam hinc atque inde cultris & gladiis, sub quâ draco jacebat, formidabilis ascensuris; quem tamen ne timerent, S. Satyrus puer, mox Martyr, scalam conscendens, socios hortabatur; cum quo tu, vaccæ, ac leoni deinde objecta, pro Christo es trucidata, cum, ad Christum negandum, te nec parentis, nec conjugis, nec lactentis tui parvuli, lacrymæ permovissent. Juva me, ut per auream patientiæ scalam cælos conscendam.

S. Felicitas M. cum Revocato
 P. fratre

fratre tuo, à leopardo occisa.

Sancti Secundole, & Saturnine,
MM. à leopardo illæsi.

S. Paule simplex, cujus obediens
& sancta oratio à Deo plura, quam
tuus magister, S. Antonius, mira-
cula impetrabat: qui probos, cum
lætis Angelis, eorum custodibus,
ad sacram synaxim euntes vidisti;
unum verò improbum custos An-
gelus mœstus sequebatur, dæmo-
nibus illum, fræno in os injecto,
regentibus. & pro illo orans, illum
deinde candidum vidisti, ac faten-
tem, se tunc carnis scelere fuisse
fœdatum, sed in templo conver-
sum, ad verba illa, istic audita: *Lava-
mini, mundi estote!* Lava cor me-
um; ut sit mundum, & charum deo,
ac Angelis ejus.

S. Eusebi, à leonibus laniate,
gladio trucidate.

B. Frederice, Horti S. MARIÆ,
pro pauperibus, Fundator, qui ca-
stitatis tuæ fideles Præsides, MA-
RIAM, Joannem, & Cæciliam, e-
legisti; Beatissimæ Virgini cultu
solido, teneroque, ad miracula
usque, amabilis; & post mortem,
odoribus, & miraculis glorio-
sus.

Sancti Theophile, & Paule, E-
piscopi,

piscopi, ob cultum sanctarum imaginum exules.

S. Gaudiose Episc.

S. Equiti, cui Angeli omnem libidinis sensum abstulerunt: qui dæmonem è moniali, quam ob comestam, nec signatam Cruce, lactucam, obsederat, fugasti; cujus linguam custos Angelus ferro tetigit, ut jam de Deo tacere non posses.

S. Anna, cujus facellum cùm in Becenno Galliæ campo restaurari vellet Deus, super locum, è quo postea imago tua hoc die effossa est, splendidum hac nocte lumen apparuit. quod cùm alii viderent, duo ex iis, qui aderant, non viderunt; facti deinde, se sibi peccati mortalis conscios tunc fuisse. Impetra cordi meo divinæ gratiæ, ac amoris ignem, & lumen.

OMNES SANCTI, &c.

pag. 44.

S. MARIA, cujus Salutationem infans, hodiernus Thomas Angelicus, in chartulâ devoravit; ope tuâ factus Angelicus moribus, & doctrinâ. Esto præses puritatis meæ, ingenii, voluntatis!

8 Martii. 8 Idus Mart.

S Philemon, è mimo nugatore
 Martyr, exprorectâ è cælo manu
 baptizate: qui, ut musica nugarum
 tuarum instrumenta combureren-
 tur, ignem è cælo impetrâsti: qui
 pro Christo flagris cæsus, per Ur-
 bem raptatus, arbori alligatus, cum
 sagittis petereris, illarum aliæ hæ-
 serunt in aëre, aliæ aberraverunt,
 una in Ariani Judicis oculum red-
 iit: qui sanguine tandem tuo ba-
 ptizatus abiisti, serio jam beatus; &
 inspersus è tumulo tuo in Judicis
 oculum pulvis visum illi restituit.
 Ora pro me, ut non nuger in rebus
 salutis meæ; ut serio agam nego-
 tium æternitatis meæ; ut bene, se-
 rio bene, agam personam hominis
 verè Christiani; ut illâ demum æ-
 ternitate coroner, quæ nugatori
 non datur; sed illi, qui dei obsequiis
 serio se impendit. Amen.

B. Joannes Dei, quem Beatissima
 Virgo spectabilis, à præcipitio, à
 patibulo, à dæmonis laqueis, à
 mortis amaritudine liberavit: cujus
 humeris parvulus J E S U S infedit:
 qui Christum in pedum lotionem ag-
 novisti: quem S. Raphaël Archan-
 gelus

gelus adjuvit, & B. Virgo solata est ante mortem; quam, provolutus in genua, obiisti, in amplexibus Crucifixum tenens.

S. Apelloni Diacone, qui perforatis calcaneis per Urbem tractus, gladio cæsus es.

Sancti Ariane, Theotice, & socii MM. quorum, in mare demersorum, corpora delphini extulerunt ad littus.

S. Quintilis Episc. M.

S. Ponti, Diacone S. Cypriani Episcopi, cum illo exul.

Sancti Cyrille Episc. Rogate, Felix, Rogate alter, Beata, Herenia, Felicitas, Urbane, Sylvane, & Mamille.

Sancti Juliane, & Felix, Episcopi.

Sancti Ascla, Leonides, & socii MM. qui Ariano Martyri, ad sepulchrum vestrum, constantiam petenti, è sepulchro respondistis: *Esto fortis Ariane; Deus protector tuus est, qui pulchram tibi martyrii coronam contexere incipit.*

B. Veremunde, qui, cum annonæ caritas pauperes urgeret, te facrificante, ac pro esurientibus orante, columba pauperum capitibus imminere, ac eos alis fovere est visa;

258 ANNI CÆLESTIS
illi verò faturi abière, non secus, at-
què si lauto convivio adfuislent
miserere èt mei.

OMNES SANCTI, &c.
pag. 44.

S. MARIA, qua hoc die S. Jose-
pho diceris desponsata; fac me Jose-
pho tuo ita perseveranter esse devo-
tum, ut, quod possibilitas mea non
obtinet, ejus mihi intercessione donetur!

S. MARIA, qua B. Joannis Dei
sudorem à fronte abstersisti, & mo-
rientem tenerè solata es. Per manus
tuas, & per cor tuum divino amori
dedico sudores meos: solare me morien-
tem!

S. MARIA, qua hoc die S. Fran-
ciscae Confessario nuntiasti, ut sensus
custodiret, Deum semper aspiceret
sempèrque attenderet, ut Deo place-
ret. Fac, ut placeam Deo: fac, ut
placeat mihi Deus; ut eum amem, ac
amer!

9 Mart. 7 Idus Mart.

S. Francisca Romana, virginum,
conjugatarum, viduarum, reli-
giosarum, exemplar sanctum; An-
gelo tibi semper spectabili, Christo
passo, & MARIAE familiaris: qua,
cum

cum Officium B. Virginis recitares, quater interpellata, obedienter illud abrupisti, & ad id, ad quod mittebaris, profecta es; ac reversa, versum, quem obedientiæ causâ abruperas, reperisti ab Angelo literis aureis exaratum: quam S. Alexius, tibi conspectus, aureo suo pallio ægram textit, atque sanavit: quæ, cum ob respectum humanum, vanum quarundam colloquium compefcere non auderes, ab Angelo alapâ es percussa: cui filius tuus è cælo gloriosus apparuit: quæ æternum inferni carcerem, cum hac epigraphe, vidisti: *Hic est locus infernalis, sine spe, & sine ullâ quiete.* quæ viso circulo maximo ac splendidissimo, in illo hæc legisti: *Principium sine principio, finis sine fine.* quæ in Eucharistico tabernaculo Agnum, & cor illius vulneratum, & lucem, & fontem, indè scaturientem, vidisti, hæc voce auditâ: *Qui sitit, veniat ad me, & bibat.* quam SS. Joannes Baptista, Evangelista, & Sancti alii, sæpius invisere, ac mira & utilia docuere. cui Deus amorem suum divinum, in prato florido, instar fontis; aliàs, instar tabernaculi; aliàs, instar igneæ columnæ, ostendit, voce quoque de

cælo missâ : Ego sum amor, pater pul-
 chrè amandi, & fulcimentum amoris,
 quæ de te ipsâ, ac de dæmone vi-
 ctrix, vidisti Archangelum tuum
 Custodem à Christo, sero è ramis
 oleæ confecto, coronari, ob eas vi-
 ctorias, quas, illo fideli præfide, re-
 portâras ; illo gratias agente pro
 donis tibi à divinâ liberalitate con-
 cessis. O sancta tot filiarum mater,
 cui MARIA JESUM in filium dedit:
 cui comedenti, decumbenti affedit
 JESUS : quæ in morte rogata, quid
 ageres ? respondisti, te id, quod re-
 siduum haberes, animæ, & spiritûs,
 Officio MARIANO recitando im-
 pèndere ; & impendisti animam
 cælo. Juva me pro æternitate,
 Francisca felix, Francisca Angeli-
 ca, Francisca JESU & MARIAE ama-
 bilis. Adsit mihi, & comedenti, &
 decumbenti, & semper, ac denique
 morienti, & in æternitate viventi,
 JESUS. S. Francisca, quæ in morbo
 extremo vidisti catenam ignitam
 ad cælum usque porrectam, sym-
 bolum tui amoris erga Deum : &
 tuas monuisti, ut essent semper in Dei
 amore ferventes. Liga cor meum,
 oculos, linguam, & me totum ca-
 tenâ illâ ignis illius, qui faciat, ut
 èt ego, & ii, qui mecum sunt, simus
 semper

semper in Dei amore ferventes. S.
 Francisca, quæ centies pectus pu-
 gnis quotidie contundebas, cor ad
 dolorem de peccatis, & ad amorem
 Dei, sic provocans. super quam o-
 rantem visa est aurea virgula, liliis
 aureis ornata, descendere: super cu-
 jus caput lumen igneum est con-
 spectum: quam Christi Vulnera
 splendore amabili perfundebant:
 quæ videbas, num novitii essent in
 arrepto religiosæ vitæ proposito
 perseveranter permansuri: ad cujus,
 necdum cõditum, cadaver, ob-
 stinati quidam, ad pœnitentiam fe-
 riò agendam, permoti sunt: & ener-
 gumenus tres carbones expuit, illi-
 cò liberatus: tu verò cuidam pec-
 cata sua non integrè confitenti, per
 quietem conspecta, dixisti: *Vade,
 explica totum, & ne verecunderis;
 quia melius est in hac vitâ pati vere-
 cundiam, quàm in futuro seculo ater-
 na supplicia.* Contere cor meum a-
 more, ac dolore: impetra mihi lu-
 men, ignem, gratiam finalem; ut
 mundus corde, amem Deum cor-
 dis mei, ex nunc in æternum. A-
 men.

S. Vitalis Abba, qui à serpente
 morsus, Crucis signo venenum
 omne extinxisti, mirabilis corporis

tui hostis. qui ab Angelo SS. Eucharistiæ ferculo es pastus. cujus cingulo pulsus est serpens, qui forminæ mentitæ, ac perjuræ collole circumdederat, & per plures menses abigi indè non poterat. cujus defuncti corpus cælesti odore fragavit; sepulchro ultrò aperto, & Angelis ibi cantare auditis.

S. Gregori Episc. frater Basilii Magni, pro Christo exul.

S. Paciane Episc. eloquentissime, atque castissime.

Sancti Cyrille, & Methodi, Episcopi.

B. Catharina Bononiensis, cui S. Thomas Cantuariensis Episc. orandi factus magister apparuit; cui ipsa nascentis Dei JESU nocte, JESUM parvulum in amplexus, in oscula dedit Virgo Mater; cujus corpus, sedens etiam-nùm, spectaculo, & admirationi est.

OMNES SANCTI, &c.
pag. 44.

S. MARIA, cujus Officium hodierna Francisca noctu ad lucem, è S. Angelo suo Custode erumpentem, recitavit, à te mirè documentis cælestibus sapius erudita. Fac me bonum tuum discipulum: fac, ut ita orem, uti desiderat Angelus Custos meus!

S. MA-

S. MARIA, qua Maria, moniali tibi devota, apparuisti, & ejus caput sero florido coronasti. Da, ut ego hinc ita coronem te, ut merear ad coronas aeternas preparari à te!

10 Martii. 6 Idus Mart.

Sancti Martyres milites quadraginta, quorum ora contusa lapidibus; qui frigidissimo hiemis tempore, nudi, sub aperto caelo, supra stagnum rigens pernoctastis; quos orantes, & caelesti luce circumfusus, & coronis è caelo venientibus coronandos vidit janitor, factus èt ipse è vobis unus, illius loco, qui à Christo defecit. Vos fractis cruribus, Melithon verò parvulus in matris amplexibus expiravit. Impetrate mihi perseverantiam, ô Sancti! ne unquam à Deo meo sim rebellis; sed ad finem usque perseverans salvus sim sinè fine. Amen.

Sancti Cai, & Alexander, MM.

S. Codrate, qui, cum matrem in cunis parvulus amisisses, à Deo, per Angelos, caelesti lacte es pastus: postea verò post flagra, unà cum sociis, cum cantu ibas ad mortem; atque ubi cum illis caput pro Christo posuisti moriens, ibi fons vivus erupit.

Sancti Dionysi, Cypriane, An-
cte, Paule, & Crescens, S. Codrati
focii, MM.

S. Victor M.

S. Macari Ep.

S. Droctovee Abba.

S. Anastasia patritia, quæ, ut au-
lam lateres, sub Anastasii veste ac
nomine, in eremo cellæ inclusa, per
octo & viginti annos, nulli visâ,
mortem prævisam radiante vultu
obiisti.

S. Attala Abba, qui tuos ad disci-
plinam & dictis, & miraculis exci-
tare conatus, à Deo es adjutus,
quando quidam, disciplinæ im-
patiens, & murmurans, feбри re-
pentè accensus obmutuit, & ex-
tinctus est; ac tres alii dissoluti mi-
serè periére; aliis Religiosis ad cor
deinde disciplinamque reversis; qui
abscissum pollicem cujusdam, di-
gito restituiisti; fluvium rapidum,
ad littus aliud abire jussisti: qui,
centum quadraginta ante mortem
diebus, ut morti te accingeres, à
Deo monitus, in Crucis amplexu
de tremendo Dei judicio anxius,
treménsque, ac lacrymando singul-
tiens, atque veniam pro peccatis
petens, cælos, quos parentes vide-
bas, ingressus es.

S. Gelasi

S. Gelasi Abba, qui, cum pro eleemosynâ tibi allatâ, Psalmum *De profundis* recitâsses, ridente illo, qui missam tibi eleemosynam attulerat, bilanci aurum tibi missum hinc, inde scriptum in chartulâ Psalmum *De profundis*, appendisti; & bilanx chartulam longè majoris ponderis præ pecuniâ esse ostendit. Impetra mihi, ut sciam temporalia hæc, ac illa æterna, in æternitatis bilance, benè appèndere, ac momentaneum hoc & leve bonum aut malum æterno illi postponere.

OMNES SANCTI, &c.

pag. 44.

S. MARIA, quam allocutus hodie S. Joseph, & Græca Ecclesia, rogat, ne abstinamus à contentione laudandi te, licet indigni. Hoc peto èt ego; ne sine me languescere, sed semper fac plus proficere!

II Martii. 5 Idus Mart.

S. Pelagia, quæ, ad martyrium ultro quærendum, pedes, unâ cum geminis filiabus, iter ingressa, ut tuum, ac filiarum pudorem servares, in profluentem defiliisti, & illo hausta es. Orate pro me, mater sancta, sanctæ filiæ; ut èt ego pretiosam

P 7

tiosam

tiosam mortem quæram per vitam pretiosam, ut inveniam pretiosam æternitatem. Amen.

Sancti Heracli, & Zofime, MM.

Sancti Candide, Piperion, & alii viginti MM.

Sancti Trophime, & Thale, MM.

Omnes sancti Martyres Antiocheni, candentibus craticulis diu affliti, aliisque suppliciis extincti.

Sancti Gorgoni, & Firme, MM.

S. Eulogi Presb. Martyrum scriptor, postea ipse Martyr.

S. Euthymi Episc. ob cultum sacrarum imaginum exul, & Martyr.

Sancti Sophroni, & Benedicte, Episcopi.

S. Firmine Abba.

S. Constantine Conf.

S. Petre, ex Hispanæ militiæ Præfecto, & Sponso, instar Alexii, ipsâ nuptiarum nocte nobilis peregrine. qui in Baucensi specu obscurus latuisti: ferro vestitus, nervis te cædens, in ediam longam non nisi crudis radicibus recreasti, omnibus cæli injuriis te exponens, humi jacens, nonnunquam in glacie: ut sic afflictatione carnis preces tuas condires, atque accenderes. cui, tempore famis, panem à se petenti, fœmina cum gemens responderet, se

se nihil omninò habere ; arcam aperuit , eamque plenam recenti pane, divinitus dato, invénit. qui oratione tuâ cælos aperuisti , ac Angelos, indè ad te descendentes, vidisti ; atque ad illos moriens ascendisti : ad cujus sepulchrum mortuus puer ad vitam rediit ; & consceleratus quispiam , cùm ad te mortuum, ad osculum tuæ manûs, accederet, arceri se sensit, te manum retrahente.

S. Vindiciane Episc. in vitâ , & morte virtutibus, ac prodigiis magne.

OMNES SANCTI , &c.

pag. 44.

S. MARIA, *cujus imago, triumphali ferculo imposita, hodie in Hispalense tuum templum illata est; doce me, ut me vincam; ut semper, unâ cum Jesu, triumphes in me!*

12 Martii. 4 Idus Mart.

S. Gregori Magne, qui inter peregrinos, quos ad mensam tuam invitabas, Christum ipsum, aliàs verò Angelum habuisti, certior ab illo factus, te Christi Vicarium à Deo destinatum: super cujus, libros scribentis, caput, Spiritus sanctus, in specie columbæ, conspectus est.

qui,

qui, lue in Urbe grassante, Beata Virginis imaginem circumferens, Angelos, *Regina cali latare, Alleluja*, cantantes audisti; & simul Angelum, cruentum gladium abstergentem, & in vaginam recondentem, vidisti: qui Monacho cuidam post mortem apparuisti, eumque monuisti, ut Superiorem de peccato quodam moneret; quippe intra triiduum moriturum: & per eundem Oeconomo significasti, diminuedos à Deo dies illius; quòd elemosynam, à te pauperibus constitutam, diminuerit, alii ægro conspectus, eumque sanans, per eum nominatim pluribus nuntiasti, ut se pararent; etenim alium post alium, aliquem die quolibet, morituros: & illi eo, quo prædixeras, ordine sunt extincti. alii quoque clienti tuo timido te exhibuisti, eumque solatus, dixisti: *Modica fidei, quare dubitasti?* Fac me clientem tuum: fac, ut me benè parem tremendo illi articulo. Ora pro me *Reginam cali*; ut illi, in ejus regno, æternum *Alleluja* cantem: ora magistrum tuum, Spiritum sanctum; ut me docilem sibi discipulum reddat, & in agone suscipiat spiritum meum. S. Gregori, qui S. Franciscam Romanam

nam

nam cum duobus Angelis visens, ejus Confessarium præclaris monitis instruxisti. inter quæ fuit, ut Christo fideret; ac ad id, quod melius est, eligendum attenderet. cor mundum esse compendium nobile, ad intelligendum, quæ non assequimur. Impetra mihi intellectum, ad caelestia perspicacem. S. Gregori, qui, hoc tuo die, S. Gertrudi gloriosus apparuisti: & Deus dixit, se *miro modo delectari* in iis, quæ scripsisti; ac in illo, quicumque librorum tuorum lectione, vel auditione, compungitur, & *ad amorem inflammatur*. cui Christus cor suum obtulit; ut inde thesauros, pro Ecclesiâ Dei, depromeres: te que cinxit zonâ ex *auro purissimo*. Doce me ita legere; ut inflammer, & delectem Deum. Amen.

S. Mamiliane M.

S. Petre, Diocletiani cubicularie, pro Christo suspense, flagris diu torte, aceto ac sale perfuse, tandem in criculâ lento igne assate.

S. Egduni Presb. & alii septem, singuli diebus singulis suffocati.

S. Theophanes, è ditissimo, pro Christo, pauperrime; qui, unâ cum Sponsâ, Deo te dedicans, tua egenis erogasti, Religiosus factus: quem

dæmo-

dæmones, porcorum specie, mor-
dere aggressi, depulsi sunt: qui fu-
riosum energumenum curasti: qui
pro sacrarum imaginum cultu, bi-
ennii carcere, ac longâ fame mace-
ratus, *optatissimam Dei pulchritudi-
nem animo contemplans*, & illas aru-
mnas, & longum ad mortem usque
exilium, æquo animo perferebas:
pecora, lue contacta, si aquâ tumbæ
tuæ aspergebantur, sanabantur:
cæcis quoque, claudis, ac aliis, e-
jus arcæ contactu curatis. sed et
*chirographum, flagitiosis actionibus
plenum, cum arca tua obsignatum ad-
moveretur, sic omnibus apparuit, ac si
nihil unquam fuisset in eo scriptum.*
Dele etiam è corde meo mortis chi-
rographum, vel quicquid navi est
illuc, quod displiceat pulcherrimo
Deo meo.

S. Bernarde Episc.

S. Isidore rustice, cujus vices,
dum tu orares, Angeli, & ad pecus
custodiendum, & ad arandum, sup-
plevère.

Sancti Ignati Loyola, Francisce
Xaveri, Philippe Neri, ac Theresia
V. unâ cum S. Isidoro, à Gregorio
XV, Pont. Max. hoc die, in Sancto-
rum catalogum ritè relati.

S. Fina V. quæ in sago cilicino,
&

& silentio, tuæ puritatis fidelis custos, ne tua repulchritudo perderet, morbo longo, & gravi ad eò contabuiſti, ut ipſa, cui accubabas, tabula, à defluentis tuæ carnis tabe putreſceret: quæ vermibus, muribusque corroſa, inter extremam mendicitatem & dolores, tamen hilaris, octo ante mortem diebus, à S. Gregorio Papâ, tibi apparente, de morte præmonita, obiſti, fragrans odoribus; & campanis ultrò ſonantibus, jam ſepelienda, manum viſa es attollere, & contactu tuo nutricem à morbo incurabili perſanâſti.

OMNES SANCTI, &c.

pag. 44.

S. MARIA, *cujus imago hodiernum S. Gregorium dicitur allocuta: loquere, Domina; quia audit ſervus tuus, utinam ſemper obediens tibi ad omnia!*

13 Martii. 3 Idus Mart.

S. Euphrasia, quæ Crucifixum complexa, tuos illi caſtos amores voviſti, Principis nuptias contempſiſti: cujus miram cum invidis, ac tentante dæmone, patientiam, & victoriam felici morte corona-

coronavit Deus, quando vita es in
cælum duci ab Angelis. Ora, ut
patiar èt ego libenter, ex motivo
amoris Dei, cum gratiarum actio-
ne. Ora, ut libenter moriar; sed in
suavissimis JESU, & MARIÆ ample-
xibus. Amen.

Sancti Macedoni, Patritia uxor,
& Modesta filia, MM.

S. Theuseta, cum Horre filio, &
Theodorâ, Nymphodorâ, Marco,
& Arabiâ, combuste.

S. Sabine Princeps, cui suspenso,
& crudelissimè laniato, frustarum
caro decidebat in terram; te intercæ-
ternitatis tormenta timenda esse,
dicente: cujus latera, & venter dum
exuruntur, ceræ liquefactæ instar
fluebat caro: qui denique cum saxo
illo sepeliri petiisti, quocum in
mare demersus es.

S. Christina V. Martyr.

S. Macæfidis V. cujus anima in
cælis gloriosa, cum centum circiter
sororibus tui cœnobii, à B. Roma-
rico visa est.

Sancti Ruderice Presb. & Salo-
mon, MM.

S. Nicephore Patriarcha, pro
cultu sacrarum imaginum, qua-
tuordecim annis exul.

S. Ansovine Episcopo.

S. Da-

S. Damiane Dalmata Archi-
episcopo, juxta quem, sacris ope-
rantem, conspectus est vir splendi-
dus, faciem tuam admirabili luce
illuminans; impetra lumen æter-
num cæco meo cordi.

S. Leander Episc. S. Hermene-
gildi Regis, & Reccaredi, magister
sanctæ.

B. Henrice, qui regiam Daniæ
hereditatem ultrò pro Christo de-
seruisti.

OMNES SANCTI, &c.

pag. 44.

S. MARIA, *qua hodiernam S. Eu-
phrasiam coronâ gloria coronare visa,
inter caelestes amplexus, dixisti: Ecce
merces tua! Post decem dies ve-
niens fruere his sæculis infinitis.
Impetra mihi, ut coroner in miseri-
cordiâ, & miserationibus æternis!*

14 Martii. Pridie Idus Mart.

S. Petre, quem, in Clarâ valle No-
vitium, inter preces, Angelus
excitavit: qui Angelos, *Laudans in-
vocabo Dominum*, canentes audiens,
ad psallendum, dolorum oblitus,
accensus es; & è morbo factus un-
oculus, gratias egisti Deo, quòd
alterum tuorum hostium amisisses;

ac

ac tandem oculos, Deiparâ olim
visâ beatos, tibi terris claudit, cælis
aperuit felix mors. Ora pro mes
oculis. Ora pro corde. Excita me
ad orandum; ut ita orem, tanquam
Seraphinorum, ac omnium Ange-
lorum, Deum amantium, Deique
laudes canentium, ignes vidissem,
vocêsque audissem. Amen.

Sancti quadraginta septem, cum
SS. Petro, & Paulo Apostolis, per
novem menses captivi, gladio Mar-
tyres.

Sancti Petre, & Aphrodisi, MM.
S. Eutychi, & socii MM.

Sancti duo Monachi, qui, licet
suspensi, & jam mortui, ab hosti-
bus tamen ipsis auditi estis psal-
lere.

S. Diacone Marficane, capite
truncate.

B. Mathildis Regina, Othonis
Magni mater, vidua, divinis laudi-
bus celebrandis, & audiendis, etiam
noctu, devotissima; blanda, & li-
beralis pauperum mater, viatorum
nutrix, domesticorum, in literis,
& virtute, magistra: cujus anima,
ab infinitâ Angelorum multitudine,
unâ cum animâ Bernardi Epi-
scopi, tunc defuncti, cum gloriâ in-
effabili, in cælos deferri est visa.

OMNES

pag. 44.

S. MARIÆ, qua ab hodierno S. Petro visa es, cum Mariâ Magdalenâ, & Ægyptiacâ, colligere sudorem, piè laborantium in messe, clientum tuorum, & frontem illorum abstergere, illósque solari. In manus tuas, & per has, ad gloriam Dei, offero sudores, & labores, & omnia, qua ago, usque ad sudorem supremum in morte!

15 Martii. Idibus Mart.

S. Menigæ, qui inter eluendos, pro artis, quam profitebaris, more, pannos, è cælo vocem audisti: *Curre, Menigne, ut ego tibi æternarum gratiarum thesauros ostendam;* & in forum procurrens, ad viscera, & ad medullas usque, pro Christo, flagris laceratus, è resectis digitis, loco sanguinis, lac dedisti; ex ore verò truncati capitis tui columba evolare visa in cælum, & in capite stella lucentissima conspecta est. Ora, ut ita curram in hoc vitæ cursu, ut illum felici morte consummem, ac tum *æternarum mihi gratiarum thesauros ostendat Deus.* Amen.

S. Zebedæe, SS. Joannis, & Jacobi Apostolorum, pater.

S. Lon-

S. Longine, qui, cum Christi la-
tus aperires, vitam, & lumen ad Co-
JESU reperisti, postea splendide
candidatus, ad martyrium, velut
ad nuptias, abiisti cum sociis; &
post mortem, non semel, in caelo
visus es gloriosus.

S. Aristobule, Apostolorum disci-
pule, Martyr.

S. Matrona ancilla, à Judæâ do-
minâ, pro Christo, ad mortem us-
que, fustibus cæsa.

S. Nicander, qui Martyrum reli-
quias piè colligens, ipse factus es
Martyr.

S. Leocritia V. Martyr, quæ, de-
sertis pro Christo opibus, gentili-
búsque parentibus, S. Eulogio dixi-
sti; *tibi oranti liquore mellis os reple-
tum fuisse*; atque ab illo audisti,
melle illo indicari eam, quâ frui-
tura eras, *regni caelestis dulcedinem*:
quæ gladio cæsa, & in Bætım flu-
men projecta, nec merfa, *erecto
corpore pergens* conspecta es.

S. Zacharia Papa.

S. Probe Episc. cui morienti Ju-
venalis, & Eleutherius, Martyres
adfuerunt.

S. Speciose, cujus animam ger-
manus tuus ferri vidit in cælum.

OMNES

OMNES SANCTI, &c.

pag. 44.

S. MARIA, cui hodie festum gratiarum actionis celebrat Carnotensis Urbs, ab hoste, per te, intactâ tuâ super portam imagine, liberata. Doce me, Deo, per te, semper, & ubique, ita gratias agere, ut gratus vivam, & moriar!

S. MARIA, quam, hoc die, cum SS. Paulo & Benedicto, vidit S. Francisca, cum paulo antè, post sumptam sanctissimam Eucharistiam, in splendidissimo lateris Christi Vulnere, pelagus amabile aspexisset. quo tempore S. Benedictus sodales Francisca, ad tenerum erga te amorem & cultum, est cohortatus. Hortare cor meum ad amorem illum: persuade illi, & imprime cultum illum!

16 Martii. 17 Kal. April.

S. Abrahame, è Sponso Eremita, latum radium semper è vultu emittens, vestibus iisdem semper use, per annos quinquaginta semper integris, atque recentibus: qui, cum videres columbulam à dracone deglutiri, & rupto draconis ventre, illam iterum evolantem; sororem tuam Mariam, à viâ sanctâ

Q ad

ad fœditates seductam columbam,
 militem indutus, inter epulas, con-
 vertisti; è draconis ventre, à dæ-
 moneluxuriæ extraxisti; & ad ere-
 mum reduxisti. Intercede pro ani-
 mâ meâ, ne columbam hanc, in
 mortis articulo trepidam, seducas,
 & glutiat inferni draco; sed illam,
 intra Vulnera sua absconditam, pro
 sanctâ æternitate, conservet JESUS.
 Amen.

S. Cyriace Diacone, qui, post
 longos carceres, liquatâ pice per-
 fusus, catastas, nervos, fustes passus
 es.

Sancti Large, Smaragde, & alii
 viginti, cum S. Cyriaco, capite da-
 mnati.

B. Hilari Episc. Tatiane Diacone,
 Felix, Large, & Dionysi, MM.

S. Anina thaumaturge, centum
 & decem annorum senex, longis-
 simis jejuniis, & duorum leonum
 comitatu, mirabilis: qui spinâ
 è leonis pede extractâ, illum per-
 sanâsti; missâ per leonem epistolâ
 stylitæ, ut iis, à quibus offensus
 fuerat, ignosceret, persuasisti.

S. Papa Martyr, qui verberibus,
 ungulis ferreis, clavatis calceis cru-
 ciatus; deinde arbori alligatus, il-
 lam è sterili fructuosam moriendo
 fecisti.

S. Juliane

S. Juliane M. diutissimè cruciate,
qui demum, unà cum serpentibus,
in sacco inclusus, in mare demersus
es.

S. Agapite Episc.

S. Heriberte Ep. luce, ac radiis
inter nascendum, & postea inter o-
randum, perfuse: quem pro tuis,
in fame ac peste, supplicem, ac
mœstum, solatus est Spiritus san-
ctus, caput tuum in supplicatione,
in columbæ specie, sæpè circum-
volans. è cuius, noctu orantis, le-
ctulo lux erumpere, ac fundi visa
est; ad quem moriturum ire con-
specti Cælites, dicere sunt auditi:
*Deo, Sanctisque omnibus dilectum He-
ribertum venimus susceptum. qui
Volberto Abbati, post mortem,
dixisti: Orationibus frater mi, sedulus
vigilanter insiste; & vivorum atque
mortuorum parentum, vel familia-
rium tuorum, salutem exorans, mei
quoque memoriam abundantius habe.
Scito enim, quia ab obitu meo die trige-
simo, qui nunc imminet, mecum pran-
surus es. Emunda cor meum; & il-
lud Deo, Dei Matri, ac Sanctis
omnibus, charum redde: doce me
orare, vivere, atque mori.*

S. Patrici, Episcopo admiran-
de,

Q 2

S. Tor-

S. Torrelle, qui, audito tertio galli, tuis repente humeris insidentis, cantu, antiquas turpitudines tuas, quadraginta integris annis, sub dio, in jejuniis, catenis, veperibus, trium tantum quotidie horarum somno, in aqua gelida, amare flevisi, vicisti; & poenitentiam, ac victorias tuas morte sancta, de illa ab Angelo premonitus, coronasti; ante mortem, ursum obedientem habuisti; puerum lupo eripuisti, & lupos omnes ab iis locis in perpetuum proscripsisti; post mortem vero gloriosus apparuisti.

OMNES SANCTI, &c.
pag. 44.

S. MARIA, *qua hodierno S. Heriberto locum templi tibi condendi ostendens, dixisti: Scias exauditas esse orationes tuas. jam ecce venio. In Divitensi castro locum mundari praece; ibique monasterium Deo, mihi, & omnibus Sanctis, constitue: ut ubi quondam abundavit peccatum, & cultus demonum, ibi iustitia regnet in multitudine Sanctorum. Impetra mihi, ut praesenti, ac futura, solidi erga te cultus excellentiam, superem omnem praeteritam malitiam, & inertiam meam!*

17 Martii.

17 Martii. 16 Kal. April.

S Gertrudis V. Pipini optimi
 Brabantia Ducis filia, ancilla-
 rum tuarum ancilla humilis: quæ,
 ut nuptias fugeres, peregrina ab-
 iisti; & cum sodalibus, in monte
 Caroli, *S. Kilians ac sociorum*, alibi
 postea *S. Foillani M.* corpora, tibi
 divinitus ostensa, reperisti. Domum
 redux, illam in sanctimonialium
 contubernium convertisti; ipsâ *I-*
da, piissimâ tuâ matre, tibi capillos
 amputante. cujus orantis capiti
 lux, igneæ sphærae instar, conspecta
 est imminere: quæ à nuntiis tuis,
 in mari periclitantibus, invocata,
 eos à periculo liberâsti. Cum verò
 te, post trium mensium spatium, è
 vitâ discessuram cælitus didicisses,
 tres illos menses ita expendisti, ut
 hoc die, anno ætatis trigésimo ter-
 tio, moriens, occurrentem tibi,
 cum *SS. Angelis*, hodiernum *S. Pa-*
tricum, læta conspexeris; & cilicio,
 quo vivens usa fueras, te indui
 jussis, tanquam veste nuptiali,
 sic ad pulcherrimi, ditissimi, nobi-
 lissimi, optimi Sponsi nuptias ab-
 itura. quæ post mortem, absenti
 monialium Præfectæ, coram B.

Q 3

Virgi-

Virginis arâ oranti, conspecta dixisti: *Certò noveris, me hodie migrâsse è vitâ: quæ coorti incendii flammâs visa es è cælo, velo tuo abigere. Fac, ut me ita mortî parem; ut memorientem Sancti, Angelique beati excipiant: abige à corde meo, precibus tuis, sordidam iræ, impunitatis, ac omnem flammam, quæ ex igne deo non est: & doce me sancto amore immortaliter toto corde ardere. Amen.*

S. Joseph ab Arimathiâ, qui corpus pro me mortui JESU in tuo monumento sepelisti.

Sancti Alexander, & Theodore, MM.

Omnes sancti Martyres, Alexandriæ cæsi.

S. Paule, pro sacrarum imaginum cultu, combuste.

S. Agricola Episc.

S. Maria, dicta Ancilla, intra angustum saxi hiatus inclusâ, M.

S. Bathildis Regina sanctimonialis.

S. Patrici Episc. qui S. Gertrudi Virgini morienti, unâ cum Angelis, ad beatam æternitatem comes apparuisti; & miserabiles animarum è purgatorio voces, in vitâ audisti.

OMNES

XVIII MARTII. 283
OMNES SANCTI, &c.

pag. 44.

S. MARIA, qua, cum ab hodierno
S. Josepho ab Arimathiâ corpus tui
Fili conderetur, adfuisti. Fac, ut grata
præstem obsequia Filio tuo, & tibi. Nam
quod illi facio, placet tibi; & quod tibi
facio, placet illi!

S. MARIA, cui hodierna S. Ger-
trudis Virgo perinsigne sacellum ex-
truxit, ad eximium purissimæ castita-
tis donum, per te, à Deo impetrandum.
Ora, Domina, ora èt pro me; ut cor
mundum, id est, cor Deo videndo &
amando idoneum, creet in me Deus: ut
cor meum sit nitidissimum tuum sa-
cellum, in quo tu erigas aureum divini
amoris altare, ô Mater pulchra di-
lectionis!

18 Martii. 15 Kal. Apr.

S. Eduarde Rex, novercæ operâ
ex insidiis occise; cujus, in æsti-
mandis, & fovendis hominibus
Deo sacris, piam liberalitatem mi-
raculis etiam ornavit Deus, quan-
do sacrum tuum cadaver, in palu-
dem projectum, ignea è celo co-
lumna prodidit, & fons ibi, morbos
fugans, erupit. Corpus incorru-
ptum, odoribus fragrans, unâ cum
Q 4 tumbâ,

tumbâ, cælesti manu à terrâ eleva-
batur quotidie; & quò transfere-
deberet, ipse apparens in gloriâ in-
dicasti. Sancte mi Rex, intercede
pro me; ut sive repentinâ, sicut tu
sive aliâ morte occumbam, occum-
bam sanctè: ut Regi Regum Deo
æternum, unâ tecum, homagium
præstem in regiâ æternitatis san-
ctæ. Amen.

S. Gabriel Archangele, misse
Deo, ad MARIAM, salutator.

S. Alexander Episc. senex, Mar-
tyr.

SS. Narcisse Ep. & Felix Diaconus
MM.

Sancti decies mille MM. gladio
percussi.

Sancti Trophime, & Eucarpus
qui è Saulis in Paulos, effuso è cælo
imbre flammeo, & hac voce: *Surgi-
te; quia poenitentibus peccata remittuntur*,
conversi, heroum Angelorum
choros vidistis; postea Mar-
tyres per ignem.

S. Cyrille Episc. qui per mira
Crucis, in cælo visæ, prodigia, ea
quæ docebas, confirmabas.

S. Frigidiane Ep.

S. Anselme Ep.

OMNES SANCTI, &c.

pag. 44.

S. MARIA

S. MARIA, *cujus* dolorum festum
 hodie celebratur. *Per omnes dolores,*
& per omnia gaudia tua, te rogo, fac,
ut ea faciam, qua te delectent; ut sim
tibi gaudio, & tu mihi!

19 Martii. 14 Kal. Apr.

S. Joseph, Sponse MARIÆ, de quâ
 natus est Jesus; qui cum Deo
 Jesu, & MARIA Dei Matre, plus
 quàm duodecim annis, conversa-
 tus dulcissimè, arcana mira didici-
 sti. Nónne cor tuum ardens erat,
 cum Deum, Deique Matrem, in
 unâ tecum domo, mensâque vide-
 res, loquentes audires? O felix Jo-
 seph, qui JESUM inter, & MARIAM,
 te consolantes, tibi que ministran-
 tes, ultimum agonem egisti, spiri-
 tum exhalâsti! à quo nunquam ali-
 quid S. Terefia petiit, quod non
 impetrâsset! cujus nobis interces-
 sione donatur id, quod possibilitas
 nostra non obrinet! Adesto mihi,
 quæso, morienti; ut me, in agone
 jacentem, suspirantem, expirantem
 juvent, ultimum spiritum colli-
 gant, & in æternum suum contu-
 bernium recipiant JESUS, MARIA,
 & Tu S. Joseph, ad cujus nomen,
 in celo auditum, omnium Sancto-
 rum

rum choros S. Gertrudis singulari
reuerentiæ significatione gaude-
tes vidit. Gratulor ego quoque
gloriæ tuæ, ac rogo, fac me tale
ut sim dignus tibi æternum cum
Sanctis omnibus gratulari. Amen.

S. Maria magdalena, hodie trans-
lata.

Sancti Quincte, Quinctilla,
Quartilla, Marce, & alii novem
MM.

S. Panchari, capite truncato
Martyr.

SS. Apolloni, & Leonti, Episco-
pi.

SS. Landoalde, & Amanti, mira-
culis illustres.

S. Joannes, corporis domitor
generose: ad cuius tugurium pyrus
folia, & flores, in Januario, Episco-
po spectante, repente produxit.
cujus corpore, post mortem, odo-
rum suauitas fragrabat.

S. Martine Ungare, ex Ordine
S. Benedicti Archiepiscopo.

B. Sibyllina Virgo, quæ duo-
decimo ætatis anno cæca facta,
Sanctum tamen Dominicum, &
postea Jesum parvulum, læta vidi-
sti, & ab eodem S. Dominico, pa-
trono tuo, primùm ad horrenda
quædam videnda ducta, deinde
glorio-

gloriosâ luce, ac odoribus plena
palatia vidisti; neque ad ima hæc
videnda reddi tibi ampliùs oculos
postulâsti.

OMNES SANCTI, &c.

pag. 44.

S. MARIA, hodierni S. Josephi
Sponsa, semper Virgo, quæ honoribus
illi exhibitis delectaris; ideòque Tere-
siam veste pretiosâ, & torque donâsti.
Ora, ut illum ita honorem, & amem,
sicuti tu vis; sicuti honoravit Tere-
sia, & alii tui!

S. MARIA, quâ ostensâ, S. Francisca
dixit Josephus tuus: Séquere Virgi-
nem. Juva me, unâ cum Josepho
tuo; ut amem, colam, imiter te!

20 Martii. 13 Kal. April.

S. Joachime, MARIÆ Dei Matris
parens beatissime, Sanctæ Annæ
conjugis sancte conjux. Sanctum
par! Vos apud MARIAM filiam; apud
filia Filium JESUM, potestis omnia.
Orate ergò & illum, & illam, pro
me. Ideò JESUS per MARIAM, &
MARIAM per vos nata est mundo; ut
ego adoptivus MARIÆ filius, JESU
servus, felici morte nascar cælo.
O! ne pereat in me JESU Nativitas,
Vita, Sanguis, Mors! Adeste mo-
rienti;

rienti ; & me vobiscum , ad Jesum
ad MARIAM filiam , abducite. A-
men.

S. Martine Archiep. Apostolice
Lusitaniæ , contra Arianos , doctus
& sancte vindex.

S. Archippe, beati Pauli Apostoli
commilito.

Sancti Paule, Cyrille, Eugeni, &
alii quatuor Martyres.

Sancti Photina, Joseph, & Victor
filii; Sebastiane dux, cum Anatolio,
Photio, Photide, Parasceve, & Cy-
riacâ , MM.

Sanctæ Alexandra, Claudia, Eu-
phrasia, Matrona, Juliana, Euphe-
mia, Theodosia, & Derphuta, cum
sorore. Martyres.

S. Niceta Ep. pro cultu sacrarum
imaginum ad mortem usque exul.

S. Wulfranne, relicto Episcopatu,
& miraculis, admirande: cuius
precibus, patena, quæ, dum sacri-
ficium celebrares, in mare cecide-
rat, indè, ad manum usque Diaconi,
emerfit: qui mare precibus divi-
fisti, eique sicco pede inambulasti:
à quo missus Diaconus, ostensam
à dæmone domum auream, & so-
lium Radbodo (si in Christum non
crederet) paratum, signo Crucis re-
pentè in nihilum redegit.

S. Cuth-

S. Cuthberte Episc. quem tunc adhuc puerum, & pueriliter ludentem, triennis parvulus monuit, ne jocis & otio indulgeres, sed ad feriam mentem componeres; qui à te contemptus, ubertim lacrymari & clamare cœpit, corruens, ac dicens: *Quid, sanctissime Antistes Cuthberte, hæc tuo gradui contraria geris? Ludere te non decet*: qui, Angelo medicinam suggerente, in genu curatus es, ac à Deo datus contra pestem protector: qui fœdas cogitationes, frigidis aquis ad collum usque mersus, extinxisti; ab Angelo curatus æger, Angelum postea hospitem habuisti, sæpè ab Angelis visitatus, cibisque cœlestibus refectus: qui Adrianum Episcopum, cælum petentem, vidisti; juva èt me, ut eò evadam.

B. Ambrosi, qui MARIAM, à primo septennio, quotidianâ Officii recitatione, & deinde sabbatinis, aliisque jejniis, & obsequiis veneratus es; & dum pauperes pasceres, Angelos musicos habuisti.

OMNES SANCTI, &c.

pag. 44.

S. MARIA, hodierni S. Joachimi filia. *Felix fuit ille, te filiâ! Oratio, ut*
 R ego,

*ego, te Matre, sim in aeternum felix
Joachimi nepos!*

21 Martii. 12 Kal. April.

S Benedicte, qui in materno utero exultare, & psallere es auditus: qui, è visa à te olim fœminæ recordatione, immundum spiritum, fœdis tibi cogitationibus importunum, inter urticas, & spinas volutatus, itâ fugâsti, ut nunquam redierit: qui discipulorum quendam, è templo, per vestis laciniam, à dæmone extrahi vidisti, eidemque orationis spiritum impetrâsti: qui bibiturus, factus, pro more, super vasculum Crucis signo, illud, vi divinâ fractum, ne venenum biberes, vidisti; S. Scholasticæ, sororis tuæ, & postea S. Germani, animam, in cælum abeuntem, aspexisti: cuius specum ingressa insana mulier, sanata est; neque deinceps unquam rediit ad suam amentiam: cuius denique anima, fulgentibus circum lampadibus, pretiosissimo pallio, velut sponsa, ornata, visa est abire in cælum; & vox audita est: *Hec est via, quâ dilectus Domini Benedictus ascendit.* O dilecte Domini! juva me

me precibus, ac meritis tuis; ut ego, & nunc, & æternum, sim dilectus, & benedictus à Domino, ac diligens, & benedicens Dominum. S. Benedicte, qui hoc tuo die, Sanctæ tuæ filiæ Gertrudi apparuisti, totus, efflorescentibus ex te rosis, undique corpore toto vernans; singulis rosis alias rosas fœcundo sinu fundentibus. quo spectaculo docuisti, quanto præmio coronaret Deus afflictationes tuas, quibus membra tua super terram domueras, plurimis exemplo ad summa omnia & ardua provocatis; & singulare in articulo mortis præsidium omnibus iis pollicitus, qui tibi gratulabuntur de illâ dignitate, quâ te Deus tam glorioso fine dignatus est honorare. Gratulor tibi et ego, cum Gertrude, ac omnibus, qui tibi unquam sunt gratulati: ac rogo, ut me viventem doceas meam carnem vincere, & protegas morientem. Amen.

Sancti Martyres Alexandrini, ipsa parasceves die, in Ecclesiâ, pro Christo moriente, occisi.

Sancti Philemon, & Domnine, MM.

S. Birille Ep. qui fontis amarissimi aquas, dulces fecisti, dulcissimo

292 ANNI CÆLESTIS
fimo Dei nomine implorato.

S. Serapion Ep. pro Christo
exul.

S. Lupicine Abba, quem, ad o-
randum, genua flectentem, dæmon
lapidibus impetebat.

S. Francisca Romana, quæ à dato
tibi, hâc die, uno è Choro Potesta-
tum Angelo, habente in manu tres
ramos aureos, contra dæmonem es
defensa. Defende me, cum tuo
Angelo, contra angelum tenebra-
rum.

OMNES SANCTI, &c.
pag 44.

S. MARIA, qua, cum JESU, acce-
pisti, deductos ad calum per *scalas ab*
Angelis, clientes tuos candidos; &
Episcopo apparens, fecisti, ut hodie
Olivetanam tuam Congregationem
ritè confirmaret. Impetra mihi, ut ubi-
que sequar ductum Angeli, me ducentis
ad te!

22 Martii. 11 Kal. April.

S. Catharina Sueca, Virgo vidua,
animarum purgatorii advocata
singularis, S. Birgittæ sancta filia,
quam, septennem tum adhuc, ob
leves ludos, à dæmonibus, pueri-
lium crepundiorum specie appa-
renti-

rentibus , flagellari voluit Deus :
 quâ auditâ , Urbanus VI, Pont.
 Max. dixit : *Reverâ, filia, tu bibisti*
de lacte matris tuæ : quæ fœminam
 nobilem , à proco dæmone turpiter
 vexatam , liberâsti , postquam illi
 confessionem sinceram , humilita-
 tem , & preces coram Crucifixo
 fundendas, persuasisti : quam in le-
 ctulo modestissimè decumbentem
 Beata Virgo benignè invisit , blan-
 déque aspexit : quæ , in salutatâ
 prius per *Ave MARIA* Virgine , nec
 ipsa agebas quicquam , & ut alii,
 illâ non consultâ, ne quicquam ag-
 grederentur , docebas : quæ S. Se-
 bastianum , puritatis tuæ præsidem
 elegisti , opemque certam sensisti :
 quæ denique apud *MARIAM* , pro
 mundo universo, quem in incendio
 videbas, opem impetrâsti ; & , per
 aliquot vitæ annos , quotidie con-
 fessa , inter Angelorum manus sa-
 cram Deo animam tradidisti : super
 cuius tumulum , index gloriæ tuæ,
 stella, funeris comes, apparuit. Ora
 pro me , unâ cum sanctâ tuâ matre,
 ut me *MARIA* , in supremo meo le-
 ctulo decumbentem invisat , id est,
 juvet ; ut omnia, quæ aggredior, illâ
 approbante perficiam ; & denique
 mundo , per frequentem , & seriam

confessionem, corde moriar; ut æternum vivam, & Deum videam. Amen.

S. Paule Episc.

S. Epaphrodite, à S. Petro in Episcopum ordinate.

S. Saturnine, & alii novem MM.

Sanctæ Callinica, & Basilissa, MM.

S. Basili Presb. & Martyr.

Sancti Octaviane Archidiacone, & multa millia, MM.

S. Deogratias Episc. multorum captivorum redemptor.

S. Benvenute Episcopo.

S. Lea Vidua.

S. Francisca Romana, quæ, hoc die, Deum, thesauros suos distribuentem, & Dei Matrem, cum S. Paulo, Benedicto, ac Magdalenâ, vidisti; Magdalenâ te hortante, ut *quereres thesauros Dei*, radices altas in Christo figeres, & cum illo *clusa in amore* maneres, neque te ab altitudine illâ ad hæc ima, nisi *amoris Dei causâ*, demitteres. S. Paulo filias tuas monente, ut omni deliberationi orationem præmitterent, Crucem amplecterentur, Christi Sanguine mergerentur. ita semper id, quod est melius, electuras. Doce me,

me, Dei amore, semper id eligere,
quod magis placet Deo.

S. Maria Magdalena, quæ, hoc
die, S. Franciscam Romanam, tuam
discipulam, *ad divinum amorem*
hortata, ei dixisti: Comprehende
illud bonum, quod te suis thesauris
implet. descende per profundam
humilitatem, & hujus descensûs
caussa sit *amor*. Doce me humili-
tatem, è sublimi Dei amore pro-
fectam.

OMNES SANCTI, &c.

pag. 44.

S. MARIA, *qua S. Catharinæ Sue-*
cicæ, à demonis tentatione afflicta,
consilium dedisti, ut matri, & Con-
fessario obediret; qua te, dum consule-
retur, salutatam, in singulis consule-
bat: illustra, & accende me consiliis
tuis!

23 Martii. 10 Kal. Apr.

S. Otho, è studioso miles, qui
à S. Bernardo, precibus invoca-
to, è carcere liber eductus es. Abibo
è ego ex hoc carcere: mors me e-
ducet; sed ut in libertatem viden-
tium, non in carcerem cæcorum e-
ducar, adesto mihi, unà cum S. Ber-
nardo tuo; & impetra, ut ubi

R 4

vincula

vīcula hęc mea diruperit Deus,
sacrificem illi hostiam laudis, una
vobiscum, semper. Amen.

S. Victoriane proconsul, & fra-
tres duo; item duo Frumentii me-
catores, Martyres.

S. Fidelis Martyr.

S. Felix, & alii viginti Marty-
res.

S. Nicon, & alii nonaginta no-
vem MM.

Sancti Domiti, Pelagia, Aquila,
Eparchi, & Theodosia, MM.

S. Theodule Presbyter.

S. Juliane Confessor.

S. Benedicte Monache, qui à
Gothis in ardenti clibano inclusus,
sequenti die inventus es illæsus.

S. Christophore parvule, octo
annos nate, flagellate, spinis coro-
nate, & omnia Christi tormenta
singillatim perpesse: cui, Cruci af-
fixo, cum latus dextrum lanceâ a-
perire pararet carnifex, dixisti: *Si
cor quaris, alterum latus mihi effodias,
& scruteris.* & simul teneram ani-
mam edidisti, corde avulso. impe-
tra cordi meo vulnus amoris Dei, à
quo discam magno animo amare,
ac pati.

OMNES SANCTI, &c.

pag. 44.

S. MARIA,

S. MARIA, in cuius Hallensi sanctuario, ad aram, argentea hodie mortui clientis tui penna est dedicata. Honori, amori tuo dedico pennam, manum, & me totum, ac omne, quicquid scribo, lego, ago, spiro. Suscipe me in aeternum!

24 Martii. 9 Kal. Apr.

S Simon, parvule tridentine, qui à ferissimis Judæis, forficibus concisus, acubus toto corpusculo punctus, distentus, variis modis excarnificatus, crucifixus, inclinato capite morientis Christi Martyr victima factus es; ad sis mihi morienti, puer sancte; & si pro Christo non potero, saltè in Christo ut sanctè moriar, impetra. Amen.

Sancti Marce, & Timothee,
MM.

S. Epigmeni Presb. gladio cæse.

S. Pigmeni Presb. in Tiberim præcipitate.

Sancti Timolae, Dionysii duo, Pausides, Romule, Agapi, duo Alexandri, securi percussi.

Sancti Romule, & Secunde, fratres.

Sancti Agapite, & Latine, Episcopi.

R 5

S. Se-

S. Seleuce Confessor.

OMNES SANCTI, &c.
Pag. 44.

S. MARIA, *cujus paranymphe, S. Gabrielis, festum hodie celebratur. Doce me, ut sim Gabriel tuus, Angelus tuus, Salvator tuus: ut obediam Deo, à quo toties sum missus ad te, quoties bona cogitatio mihi incidit, impensissus colendi te: ut impetrem per te, quod peto per te!*

S. MARIA, *cui (spectante id S. Gertrude) cum Miserere mei Deus! diceretur; Christus omnia, qua dicebantur, verba, dedit in specie margaritarum: & dixit; se illis cordibus eximie delectari, qua, cum patientiâ, & fidentiâ, omnia, qua patiuntur, committunt Deo, qui diligentibus se omnia commutat in bonum. Domina, doce me sic Deum delectare: fac, ut omnia, qua inter orandum dico, & omnia, qua ago, qua patior, sint in tuis Filii, ac tuis manibus, pulcherrima margarita!*

25 Martii. 3 Kal. Apr.

AVE MARIA, *gratiâ plena, Dominus tecum; ancilla Domini, Mater Dei, in quâ hodie Verbum caro factum est. Esto mihi MARIA; impetras*

impetra, ut in gratiâ moriar, ô gratiâ plena! ut Dominus sit mecum, & ego cum Domino in æternum! O *benedicta in mulieribus*, ora, ut *benedictus fructus ventris tui* JESUS, sit mihi viventi, & morienti, JESUS. Ita fiat, ô S. MARIA, *Mater Dei*, viventium, & morientium, ac prædestinatorum Mater! S. Gabriel, Archangele MARIANE, saluta mecum, & pro me MARIAM; & doce me illam salutare: ut *oret pro me; oret nunc, dum vivo; nunc, dum oro; nunc, dum sum in periculo damnationis æternæ; & tunc, in horâ; tunc, in momento; tunc, in sudore; tunc, in agone, mortis meæ.* Amen.

S. Quirine, post facultates amissas, verbera, & gladium, in Tiberim projecte.

Sancti ducenti sexaginta duo MM.

S. Irenæe Ep. abscisso capite M.

S. Dula, ancilla militis, pro puritate occisa.

S. Crucifixe latro, qui Christum confessus, & invocans, ab illo moriente audisti: *Hodie mecum eris in paradiso.*

S. Pelagi Ep. pro Christo exul.

Sancti Baronti, & desiderii, Confessores.

R 6

S. Her-

S. Hermelande Abba, ex aulico regio; qui Maurenti Abbatis animam, ducibus Angelis, ad cælos migrare conspexisti; mira alia patrasti; & quendam, pœnitentiam differentem, horrendâ morte intra mensem extinguendum, verus vates, prædixisti.

S. Mechtildis, quæ hoc die annos tuos in amaritudine animæ recogitans, peccatorum tuorum cineres vidisti, coram Christo, in nihilum redactos: & ipsa coram illo stans instar puri auri, JESUM, cum aureâ è corde illius fistulâ exeunte, conspexisti: qui dulci voce canens, *Laudem dicite Deo nostro omnes Sancti ejus*; & sensus tuos ad imitationem suorum sensuum invitans, suos oculos tuis oculis, aures auribus, cordi donavit, cum omni *exercitatione divini amoris sui*. unde tu *amore divino liquefacta*, tanquam cera, sigillo JESU munita es; illis quoque verbis à JESU, in Eucharistiâ recepto, auditis: *Tu in me, & ego in tei & in æternum non derelinquam te. per divinum cor meum semper me laudabis. Doce me amare, dolere, & esse instar cera, à facie ignis amoris Dei.*

OMNES SANCTI, &c.

pag. 44.

S. MARIA,

S. MARIA Annuntiata, cujus Florentina imago, à pictore cœpta, ab Angelo perfecta est: mitte Angelos, qui me iuvent; ut sim constans, ut benè cœpta perficiam, quicquid contra moliantur angeli tenebrarum. AVE MARIA!

S. MARIA, qua, hoc die, S. Mechtildi conspecta es, zonam auream, cum cymbalis aureis, manu tenens, omnibus Sanctis Deum laudantibus; Angelorum choris, instar muri, ad calum usque porrecti, Nazarethanam tuam domum cingentibus, Gabriele vexillum regium, aureis literis inscriptum, gestante, ac ignito Seraphinorum choro speciosum JESUM comitato. Commenda me Seraphinis, quorum Regina es; ut me perpurgent, & comitem Christo adjungant!

S. MARIA, in cujus cor, hoc tuo die, cum AVE MARIA caneretur, vidit S. Gertrudis, à Patre, & Filio, & Spiritu sancto, tres rivulos procedentes, & è corde tuo in Deum redeuntes: & divinitus significatum illi est, salutatione illâ Deum, te, Angelos, ac Calites omnes, mirificè delectari; S. Gabriele singulari tunc splendore persuso, cum ea recitatur corde attento. Tu verò Gertrudi tua, petenti à te instrui, pro Eucharistiâ sanctè sumendâ, monile pretiosum dedisti; documentum puri-

tatis, humilitatis, ferventis desiderii, cognitionis, tranquillitatis, amoris, delectationis in Deo. simul promittens, quòd verè Matrem te monstrare velis illi, qui tibi de hujus diei gaudiis gratulatur: docensque, semper, cum saluatio Angelica recitatur, in fine illius, divinum amorem esse petendum. Fac, ut illum ita petam, ut impetrem: fac me dignum saluatorem tuum!

26 Martii. 7 Kal. Apr.

S. Ludgere Ep. qui etiam-tum parvulus, quid toto die egisses? rogatus, dixisti, libros te composuisse, legisse, scripsisse; Deus, aiebas, *me docuit*: qui postea patris miraculis, cum beatae mortis tempus propè adesse intellexisti, orationibus, sacris lectionibus, concionibus, ad mortem usque, intentus, illi te parasti: qui cuidam post mortem spectatus, illum de animi levitate, ac puerili mobilitate vehementer increpuiisti, eumque deinde in pede sanasti: in cujus sepulchri crypta odor liliorum perceptus, & globus igneus conspectus est; pluresque ægri, vesperi istuc ingressi, manè incolumes exière. ora, ut omnia,

omnia, quæ totâ die, totâ vitâ ago,
& quæ totâ & vitâ, & morte agam,
& patiar, ita agam, ut verè dicere
possim: *Deus me docuit.* Ita agam
omnia, prout ille me docet! ut in
æternitate ibi sim ego discipulus,
ibi est Magister meus Deus. A-
men.

S. Gregori Archiep. totis nocti-
bus coram Crucifixo prostrate, &
centies adorans.

S. Castule Martyr, hospes San-
ctorum.

Sancti Petre, Marciane, Jovine,
Thecla, Cassiane, & alii Marty-
res.

Sancti Theodore Episc. Irenæe,
Serapion, Ammoni, MM.

SS. Montane Presb. & Maxima,
MM. flumine merfi.

Sancti Quadrate, Theodosi, Em-
manuel, & alii quadraginta Marty-
res.

S. Eutychi, & alii MM. gladio
cæsi.

Sancti Brauli, & Felix, Episco-
pi.

OMNES SANCTI, &c.
pag. 44.

S. MARIA, *cujus saluatoris Ga-
brielis Angeli dies est hodie apud Gra-
ecos: & cujus hodie festum miraculo-
rum,*

304 ANNI CÆLESTIS
rum, *apud Sueffionenses celebratur.*
Per omnia, qua per te miracula fecit
Deus, te rogo, doce me te benè salutare:
fac mecum unum hoc miraculum, ut
tandem sim perseveranter, ac seriò ser-
vens Dei servus, ac tuus!

27 Martii. 6 Kal. April.

S. Ruperte Ep. Apostolice, regiã
stirpe nate; cui ipso Paschatis
die, post Sacrum celebratum, mo-
rienti, Angeli læto cantu accinen-
tes, animam tuam ad æternum Al-
leluja duxerunt; & iidem è celo,
splendidè candidati, funeri adfue-
runt. Adesto mihi, cum Angelis
tuis, ope tuã; & mortem, aliàs hor-
rendam, tuo tuorúmque Angelo-
rum auxilio, amabilem effice: ut
uterque Deo nostro, in æternitatis
Paschate, felix Alleluja cantemus
æternùm. Amen.

S. Alexander miles Pannon, post
multos pro Christo agones, & mi-
racula, decollate.

S. Philete senator, cum uxore
Lydiã, & Macedone, ac Theopre-
pide filiis, itémque Amphilochio
Duce, & Cronidã, MM.

SS. Zanita, Lazare, Marota, Nar-
fes, & alii quinque, sævissimè truci-
dati.

S. Isaac,

S. Isaac, à tribus candidatis Angelis è spinis exempte, in quas te Valens Imp. à te, ob orthodoxam fidem vexatam, reprehensus, coniecerat: qui clausas Urbis portas signo Crucis aperuisti: aperi mihi cælum; & fac, ne illud meâ inertia mihi claudam.

S. Augusta V. M. à patre Principe, ob fidem, evulsis duobus dentibus, inter duas arbores, suspendi iussa: sed, cum ab igne subjecto illa sa maneres, ad rotam, clavis confertam, damnata, & Angeli, rotam confringentis, operâ liberata, capite truncata es.

S. Joannes Anachoreta, ad quẽ per años quinquaginta nullus ingressus est, fœminis ne ad colloquium quidem, aut ad conspectum, admissis: qui infirmæ nobili fœminæ absentis, vivus tunc adhuc, apparuisti; eamque persanans, memorem beneficiorum, à Deo acceptorum, & Deum timere iussisti: qui Theodosio Imperatori, quomodo, & quas victorias esset reportaturus, lapè prædixisti, verus vates. Oia pro me, & juva me, ut me vincam; ut in me triumphet Deus, non dæmon.

OMNES SANCTI, &c.

pag. 44.

S. MARIA,

S. MARIA, *cujus saluatio Angelica, AVE MARIA, lingua hodie mortui clientis tui, literis aureis inscripta, reperta est. Inscribe linguam meam, cor meum, animam meam: hæc omnia tibi transcribo, & per te offero, ad maiorem gloriam Dei mei!*

28 Martii. 5 Kal. April.

S. Gunthramne Rex, qui, ut plura tibi pro morte, & iudicio, auxilia præparares, in egenos, ac templa, sanctè prodigus, ostentum, per quietem, & postea repertum, thesaurum opulentissimum, totum in pauperes, ac templa effudisti, habiturus thesaurum in cælo. Ora, & doce me, sancte Rex, ut quicquid mihi morienti solatio, vel auxilio fore cognovero, id faciam, & nunc, serio, in singulis quæ ago, thesaurizem mihi thesauros amoris Dei æternos, hæc, & in aureâ æternitate. Amen.

Sancti Prisce, Malche, & Alexander, Martyres, bestiis dati.

Sancti Castor, & Dorothee, Martyres.

Sancti Rogate, Successe, & alii sedecim Martyres.

S. Sixte tertie, Papa.

S. Spes,

S. Spes, Abba patientissime, in longâ quadraginta annorum cæcitate, à quâ divinitus tandem curatus es: cujus anima, in columbæ specie, visa est in cælum ascendere.

S. Conon, qui nobilissimos parentes reliquisti, factus S. Basilii filius, permotus auditâ illâ Evangelii sententiâ: *Qui amat patrem, aut matrem plus quàm me, non est me dignus.* qui Religiosum quendam ad mentem revocasti, dum, ob pecuniam ab illo congestam, vidisti dæmonem, serpentis instar, illius gutturi circumdatum: qui ferreo cingulo adeò utebaris, ut sub eo vermes, è carne tuâ putridâ, nascerentur: qui fœminam, pudicitia tuæ impudicam, & mendacem calumniatricem, ideòque à dæmone obsessam, mox innocentia tuæ testem, à dæmone liberasti: qui Præfecti filiam ab apoplexiâ, educto ex illius auribus palmarum verme, sanasti; magnus contra dolores aurium, dæmonesque patronus: cui, in ecstasi posito, Angelus nuntius mortis fuit, quam cælesti afflatus fragrantia, genibus humi fixis, campanis spontè sonantibus, obiisti.

OMNES

308 ANNI CÆLESTIS
OMNES SANCTI, &c.
pag. 44.

S. MARIA, *quæ cum orante bo-
dierno, elevato à terrâ, cliente tuo, in
: imagine loqui es visa; quo viso, qui
calumniam in illum moliebatur, abs-
territus est. Eleva cor meum à terrâ
defende me, doce me tecum loqui!*

29 Martii. 4 Kal. Apr.

S. Eustachi Abba, sexcentorum
fermè monachorum sancte ma-
gister; tu idem divine morborum
medice: quem, per quietem sibi of-
tensum, vidit puella ægra, vocem-
que audivit: *Quodcunque tibi dixerit
vir iste, fac; quam tu postea vigilem,
à febris, oculorumque caligine per-
sanasti: qui æger, per visionem
nocturnam interrogatus, an per
quadraginta dies remissius, an per
triginta acrius, torqueri doloribus
velles? acriores triginta dierum
dolores elegisti, trigesimo post die
te moriturum dicens, ac te parans,
atque tunc extinctus. impetra mi-
hi, ut quicquid mihi, sive per in-
spirationes, sive per suos vicarios,
dicit Deus, obedienter faciam; &
quicquid ago, vel patior, sit mihi
pretiosa occupatio, ad mortis feli-
cissimè*

ciffimè obeundæ expectationem.
Amen.

S. Jona, flagris, glacie, præcisifis
digitis cruciate, & capitis cute ab-
rasâ, linguâ evulsâ, in picem ar-
dentem detruse, nec læse; in cochleâ
totis ossibus confracte; per medium
secte Martyr.

S. Barachisi, Jonæ frater, arden-
tibus glebis igneis, plumbo lique-
facto in palpebras, & nares infuso,
spinis, arundinibus laniate, cochleâ
confracte, os bulliente pice replete,
fratrem ad gloriam subsecute.

S. Cyrille Diacone Martyr, cu-
jus jecur gustantes gentiles, denti-
bus amissis, putrefactis, & ef-
fluentibus linguis, ac oculis, peri-
erunt.

Sancti Pastor, Victorine, ac socii
MM.

S. Armogastes Comes, pro Chri-
sto in tibiis, & fronte, nervis cru-
ciate, & pede altero suspense; pro
quo sepeliendo, egesta terra sub ar-
bore, splendidum è marmore sarco-
phagum ostendit.

Sancti Mascula, & Sature, regiæ
domûs procurator, Martyres.

S. Secunde Martyr.

S. Paule, qui, hoc die, S. Fran-
cisæ suasisti, ut solitudinem ama-
ret,

ret, ac ibi cum divino amore sola tractaret. deinde monuisti: *Firma te in amore Dei. habe mentem modestam. para te semper ad videndum Deum. & respice ea, quæ ei placent. revertere in te, & latare in Deo tuo. Ædifica mihi sanctas solitudines, in quibus amor Dei me inflammet, ac doceat querere, quæ Deo placent.*

OMNES SANCTI, &c.
pag. 44.

S. MARIA, *cujus hodie miraculorum de cryptâ festum in Sicilia celebratur. Sim ego miraculum tuum, Domina, Mater admirabilis. Juva me, ut sim in celo inter eos, quos in vitâ, & morte, admirabiliter protexisti!*

S. MARIA, *qua, hoc die, S. Franciscæ, splendida Filii tui Vulnera, & te quoque, videnti, dixisti: O anima, amor te strinxit. anima pulchra, recipere poma pulcherrima, quæ amor Dei produxit. Domina, cum dies mei sint sicut naves, poma portantes; imple meos dies pulcherrimis pomis, seu fructibus amoris Dei. doce cor meum Vulnera Christi tui aspicere; amore stringi, ac ad accipienda ejus munera dilatari!*

30 Martii. 3 Kal. April.

S. Regule Episc. qui ad aram, di-
vino sacrificio intentus, tres
columbas, trium Martyrum nomi-
na ore ferentes, vidisti; ranis, sub
concione foris coaxantibus, silen-
tium indixisti; carceres ultrò tibi
patère, & vinctos dimittere fecisti;
dæmonibus semper terribilis. Re-
move à me, quicquid me impedit
ab iis, quæ Dei sunt: ora, ut nec
nunc, nec in agone meo, audeat
in me quicquam dæmon, toties à te
victus; ut denique meum etiam no-
men cælestes columbæ ferant, non
infernales corvi; legarque inter e-
lectos. Amen.

S. Quirine tribune, cum totâ do-
mo baptizate, post linguæ abscis-
sionem, equulei suspensionem, ma-
nuum, ac pedum detractionem,
gladio M.

Sancti Domnine, Victor, & socii
MM.

Omnes sancti Martyres Con-
stantinopolitani, pro fide Catho-
licâ, inauditis tormentorum gene-
ribus occisi.

SS. Pastor, & Zosime Episco-
pi.

S. Joannes

S. Joannes Climace, cujus cibus, potus, somnus, citra saturitatem fuit; qui magnus viututis magister, tentationes adeò compescuisti, ut Angelicâ postea libertate gaude- res.

S. Clini Confessor.

OMNES SANCTI, &c.

pag. 44.

S. MARIA, qua trigesimâ Martii cõdito, ut ajunt quidam, & lapso homine, prædicta es à Deo, serpentis caput contritura. Contere caput illius, quicumque seu homo, seu demon, mihi serpens est, ut me mordeat, ut me à bono quopiam abducat, vel in pec- catum inducat. Fac me de illo victo- rem!

31 Martii. Prid. Kal. April.

S. Guido, cui Martinus laicus, morte tunc resurgens, dixit; vi- sa à se terribilia loca pœnarum, & multos istic notos, atque propin- quos suos: adfuisse sibi trementi- forissimum virum, & stolâ candi- dâ, tiarâque insignem, qui manu alterâ virgam, alterâ favum mellis tenens, eumque ad comedendum blandè invitans, dixerit se esse S. Michaëlem, ad eum consolandum missum.

missum. Tùm se, comesto favo,
 iustum ab eo redire ad corpus, tri-
 duo adhuc victurum. Ita ille triduo
 illo, quo vixit, aiebat sibi esse
 in palato semper favi mellis dulce-
 dinem; ac triduo post obiit, tuâ
 benedictione acceptâ. Tu Berthol-
 dum quendam, in amaro agone
 valdè luctantem, & ob conscientia
 stimulos mirè anxium, ut sibi red-
 deretur impetrâsti, & antiquum
 quodpiam peccatum palàm fas-
 sum, narrantemque, quàm hor-
 rendè illud (etsi per oblivionem
 tantum in confessione exciderit) si-
 bi objectâssent in agone dæmones,
 animam præcipitare ad infernum
 conati; pœnitentiâ expiatum, ad
 felicem agonem iuvisti. Juva èt
 me, ubi me in difficili illo agone
 videris; ut in pace conscientia
 pura, & in pace Christi, requiescam.
 Amen.

S. Amos Propheta, vecte per
 tempora transfixe.

Sancti Theodule, Anesi, Felix,
 Cornelia, & socii Martyres.

S. Benjamin Diacone, zelo ple-
 ne, qui unguibus, arundinibus
 acutis confixus, & spinosâ sude
 per alvum transmissâ, Martyr ef-
 fectus es.

S — S. Balbina,

S. Balbina, filia Quirini Martyris, Angelo paranympho, Christo desponsata, quando istibi, à strumâ sanata, apparens cum face, aspectu elegantissimo amabilis, dixit: *Jesus Christus, Balbina, te sanam fecit; & te in sponsam suam accepit.*


S. Francisca Romana, quæ, hodie, deducta es in chorum *Seraphinorum*, in quo omnes calor suavissimus inflammabat; Seraphinorum uno tibi dicente: Fac in bono ut perseveres; quia *amor te expectat, & vult, ut à te discedas.* habe cor mundum, manus innocentes, intentionem rectam. Ascende, & sta semper *in divino amore.* anima ab amore ducitur ad *Seraphinos*, & amore calet, ac ardet: nec vult reverti ad sæculum, obfitum spinis, ac tenebris. Ita ille. Impetra mihi à Deo, ac Seraphinis, ignem exurentem spinas meas, illuminantem tenebras meas, & erudiantem me in arte artium amoris Dei.

OMNES SANCTI, &c.
pag. 44.

S. MARIA Lucensis, cuius hodie imago inclaruit occasione impii aleatoris. Impetra mihi veniam pro omnibus, quibus JESUM, quibus te, offendi:

offendi: & vel hinc tua gloria eluce-
 scat. Utinam plus possem honorare,
 amare te, quam ullus te unquam
 ignominia sit vel odio persecutus!

Ad majorem DEI, DEIFARÆ, 26
 Sanctorum omnium gloriam,
 & ultimi agonis nostri so-
 latium sanctum.



A
Aff
Ag
Ala
S. A
All
Am
Am
Am
8
3
2
Am
Am
An
2
An
An
An
An
An
An
An
An
An